


HOMENAHE DI KIWANIS CLUB OF ARUBA NA NAN FUNDADOR



ORANJESTAD (AAN): Durante e anochi di 17 di Maart cu a pasa, Kiwanis Club of Aruba den un forma hopi special a conmemora e fundador di e club na bida yama Clinton Whitfield (q.e.p.d.). Riba e anochi aki a homenajea e persona cu tabata e sosten principal pa difunto Clint, esta su señora viuda Louisa cariñosamente yama Mosa. Durante e asina yama "Mosa Night" den Surfside, Kiwanis Club of Aruba a conta cu presencia di Mosa, tur e miembronan cu nan respectivo señora, varios invitadonan special y tambe e grato presencia di Kiwanis Club of Palm Beach.

E anochi a ser habri cu palabranan di bon bini di presidente di Kiwanis Club of Aruba, Joe v.d. Linde, sigui pa un oracion di Pater Boks. E presidente di Kiwanis Club of Palmbeach, Tico Monte, a expresa e importancia di e union entre e dos clubnan di Kiwanis aki na Aruba.

Mester bisa cu e anochi a transcuri cu un cena agradable y ameno durante cual Frank Booi a haci un brindis

special na tur e damanan presente. Gordon Kimatrai a efectua a instalacion di e miembro Junior Tromp cu a ricibi su boton di e miembro Jani Croes.

Un mensahe interesante a ser treci dilanti door di Tony Green, y durante su discurso el a analiza y defini e palabra "Success". Green a relata cu succes no ta e hecho di tin placa, fama, hopi diploma, status, ni bon apariencia, sino e hecho di ta un trahador duro, cu perseverancia. E persona exitoso den bida ta esun cu no ta discrimina den ningun sentido, ni riba nivel social, ni riba nivel economico. Clinton Whitfield a ser tuma como un ehemplo di esaki.

Como cierre di e anochi aki, 3 reconocimiento a ser otorga na viuda Mosa door di Erwin Provence, Oscar Antonette, y presidente Joe v.d. Linde, cu a instala Mosa como miembro honorario y permanente di Kiwanis.

Kiwanis Club of Aruba ta spera cu difunto Clinton Whitfield lo ta un gran inspiracion pa pueblo en general.

E simiya cu Clint a planta, awe ta cosechando fruta pa e muchanan, e bieunan, y esnan menos afortuna den comunidad.

Por ehemplo ultimamente Kiwanis Club of Aruba tabata tin proyectonan pa cu Casa CUna, St. Annaschool, y un proyecto andando cu e.o. Imelda Hof. Pa e resto di aña Kiwanis tin varios proyectonan prepara pa beneficia specialmente e mucha- y bieunan.

Riba e fotonan por mira presidente di Kiwanis Club di Aruba entregando Tony Green un certificado di aprecio pa su discurso, y tambe momento cu Mosa ta ser instala como miembro honorario y permanente door di presidente Joe v.d. Linde.



INSTALACION DI JUNIOR TROMP COMO MIEMBRO DI KIWANIS



ORANJESTAD (AAN): Kiwanis Club di Aruba a inyecta su mes figurativamente y simbolicamente cu sanger nobo durante e anochi special di conmemoracion di e fundador di Kiwanis Club of Aruba.

E instalacion a ser efectua pa Gordo Kimatrai y e boton entrega door di Jani Croes. Esaki ta ilustra e crecimiento di Kiwanis Club of Aruba te cu e dia di awe. Frederik Philip Tromp mihor conoci como Junior Tromp ta e "fellow K" nobo di dicho club.

Junior no ta desconoci den comunidad, ya cu e ta un joven dinamico cu despues di

a caba HAVO a sigui su estudio na HTS Tilburg, HTI-Calculatie na Amsterdam y Rijksbrandweer Academie na Schaarsberg.

Esaki a ser prosigui pa un posicion clave na Aruba pa varios aña den e Departamento di Bombero, unda el a trece su capacidnan den practica na un forma responsable.

Awor Junior ta ocupa un posicion importante den e compania mas grandi localmente, esta Sun Development.

Manera cu Junior a expresa den su discurso e ta orgulloso di ta un miembro di Kiwanis

Club of Aruba, specialmente considerando e hecho cu el a ser instala durante e anochi den cual e fundador Clinton Whitfield ta ser conmemora. E ta cla y dispuesto pa traha den proyectonan pa sirbi comunidad. Especialmente pa traha na bienestar di muchanan, e grandinan, y esnan den necesidad. Durante e anochi aki mayornan di Junior, ex-Gobernador Felepit Tromp y señora, tambe a haci acto di presencia como invitadonan di Kiwanis Club of Aruba.

Riba e foto aki por aprecia e momento cu Junior Tromp ta ser instala door di "Fellow K" Jani Croes.

Easter Sale na

Flossy's Fashion

Pariba di Abraham de Veer School na San Nicolas.
50% di descuento ariba bistir pa hende muhe, sapato, short y blusa. Pa hende homber tin camisa, carson, short, sweater y tambe paña di mucha. Tin sapato na Afl.15, = y Afl. 20, =
E baratillo ta for di Maart 24 te cu April 2, 1993

